

त्यसौ वाऽआदित्य एषोऽग्निरमुं तदादित्यमित ऊर्ध्वं प्राञ्चं दधाति तस्मादसावा-  
दित्य इत ऊर्ध्वः प्राङ् धीयते ॥३६॥ अथैनं प्रसलव्यावर्तयति । अमुं तदादित्यं प्र-  
सलव्यावर्तयति तस्मादसावादित्य इमां लोकान्प्रसलव्यनुपयैति ॥३७॥ उदरमु-  
खा । योनिरुलूखलमुत्तरोखा भवत्यधरमुलूखलमुत्तरुः क्युदरमधरा योनिः शिश्रं  
मुसलं तद्वृत्तमिव भवति वृत्तमिव हि शिश्रं तदक्षिणत उपदधाति दक्षिणतो वै  
वृषा योषामुपशेते यदु पशोः संस्कृतस्यान्नं तदूर्वेष्टका तस्य वाऽएतस्योत्तरोऽर्ध  
उदाहिततरो भवति पशुरेष यदग्निस्तस्मात्पशोः सुहितस्योत्तरः कुक्षिरुन्नततरो  
भवति ॥३८॥ ब्राह्मणम् ॥ १ [५. १.] ॥ ॥

पशुशीर्षाण्युपदधाति । पशवो वै पशुशीर्षाणि पशून्वैतदुपदधाति तान्युखा-  
यामुपदधातीमे वै लोका उखा पशवः पशुशीर्षाण्येषु तल्लोकेषु पशून्दधाति त-  
स्मादिमऽएषु लोकेषु पशवः ॥ १ ॥ यद्वेवोखायाम् । योनिर्वाऽउखा पशवः पशु-  
शीर्षाणि योनौ तत्पशून्प्रतिष्ठापयति तस्मादद्यमानाः पच्यमानाः पशवो न क्षी-  
यन्ते योनौ ह्येनान्प्रतिष्ठापयति ॥ २ ॥ यद्वेव पशुशीर्षाण्युपदधाति । या वै ताः  
श्रिय एतानि तानि पशुशीर्षाण्यथ यानि तानि कुसिन्धान्येतास्ताः पञ्च चितय-  
स्तद्यास्ताः पञ्च चितय इमे ते लोकास्तद्ये तऽइमे लोका एषा सोखा तद्यदु-  
खायां पशुशीर्षाण्युपदधात्येतैरेव तक्षीर्षभिरेतानि कुसिन्धानि संदधाति ॥ ३ ॥  
तान्पुरस्तात्प्रतीच उपदधाति । एतद्वै यत्रैतान्प्रजापतिः पशूनालिप्सत तऽआलि-  
प्स्यमाना उदचिक्रमिषंस्तान्प्राणेषु समगृह्णात्तान्प्राणेषु संगृह्य पुरस्तात्प्रतीच आ-  
त्मन्नधत्त ॥ ४ ॥ तद्वाऽएतत्क्रियते । यदेवा अकुर्वन्निदं न्वस्मात्ते पशवो नोच्चि-  
क्रमिषन्ति यत्वेतत्करोति यदेवा अकुर्वंस्तत्करवाणीत्यथो प्राणेष्वेवैनानेतत्संगृह्य  
पुरस्तात्प्रतीच आत्मन्धत्ते ॥ ५ ॥ यद्वेव पशुशीर्षाण्युपदधाति । प्रजापतिर्वाऽइद-  
मग्रऽआसीदेक एव सोऽकामयतान्नः सृजेय प्रजायेयेति स प्राणेभ्य एवाधि प-